

AENTSU NINIURIN CHICHAME MASHINIU AMIKTIN

Yánuam 10, 1948 uwítin, Naciones Unidas-num núkap aents tuákar, kákaram chichaman amíktinian etsérkaru aíniawai. Jú chichaman yajá nunkanam aújas nekawar, etsérkar, aujmattsar inianákíariat tusar najánawaru aíniawai. Tura aentsank uchi unuimiainiana ausha, aentsu chichame étserkamuana aún achikíar aujsar, unuimíarar nekawar nii pujamuri umintikíariat tusar. Tura aentsank yajá nunka tepakmanumash mash jú papín nekawar, etsérkar, paán ajásma atí tusar. Tuma asamtai nukap aents tuakar, jú chichaman yajá nunka. etserkamu atí tusar ejéraru aíniawai.

JUÁRMA

Aents yajauch chichaman waintsuk ankán pénker pujustin aíniawai. Yajá nunkanam . aentsu chichame etsérkamu mashi paárlt ajástin aíniawai. Shuar chíkích aentsjaish nuamtak métekkrak íisma atin aíniawai.

Aentsu chichame pénker etsérkachma, nekáchma asamtai, shuar wishikkramu, asútiamu, eméskamu, awáttramú, yajaúch amákma aíniawai. Tuma asamtai yamaikia ukúnma aí aents nuámatak nunkanam pénker asutiachma, waittcha pujúsat tamaiti.

Aents yajauch nétse aínis enentaimin, aentsu chichame mashiniu amiktin, kákaram papinium aárma arantukma tama awai.

Yajá nunka tepakmanumash ii shuarijiaish pénker nekaniar, arántunaikíar pujustin tamaiti.

Naciones Unidas-num aents anaikíamu ainia aú iruntrar, aents métekkrak armí tusar papínium aárar útsukaruiti. Aentsan aishman, nuajaish métek emkíar, takakmíar, weenak, ankan penker pujusarat pujusarti tiaruiti.

Yaja nunkania ainiana au, Naciones Unidas-num irunar chichaman júki wenana aú, yaintai tiaru ainiaiwai. Shuara chichame mashi nekáwar amikíariat tiaruiti.

Aentsu chichame mashiniu amiktin, papinium paánt kákaram aárma asamtai, mash nekawar amikiartitiaruiti.

MASH AENTS TUÁKAR AÚJMATISAMU

Júna étserewai

Aentsu Niniurin Chichame Mashiniu Amiktin

Aentsu chichame mashiniu amíktin etsérkamu asamtai, Naciones Unidas-num aents irutkamunmania, mátsatkamunmania tuákar, jú chicham pénkér amikíariat tusaraujmatсар etsérkaru aíniawai. Ashi aents takakmainiana ausha ju chicnaman nekáwar unuiniaki, etsérkíar weénawai. Kákaram chicham aárman, ju nunkanam tura yajá nunkanmash arantukar amikíariat timiaiti.

TÁMA CHIKÍCHIK

Aents yajá nunkanam akínia asamtaish, metekrak ainiaji. Tumasha ni chichamenka tuke amiktin aíniawai. Ni iniakmamuri, ní chichamejaituke aníakmamsar chichakartin aíniawai. Tuma asamtai aents mash nekawar, penker metekrak, nuamtak wará warat shiir pujusarmi tusar aárma awai.

TÁMA JÍMIAR

Mash nunkanmania aents matsatka aínia aú,jú papi kákaram aarma, nii amikiartin tama etsérkamuiti. Tura nua, aishmankash, nii chíkích yuúsrin takakíatsha; yajá nunkanmania áchitkíaitiat, chíkích aentsjaish apatkar iyamka metekrat ainiaji. Aents chíkích aentsjai páchitkíaitiat, niisha kuitia takakchaitiat, turuskesh takakuitiat, yajá nunkanam akiniatkiusha chíkích aetnsjaish métekkrak aíniawai. Tuma asamtai aents nisha iirka akush juú nunkanam pujátikia, penker pujúsar, kákaram papí aárma ána aún tukeumiktiniaitji.

Nunisan aents mash nunkanam niisha pujuinia ausha, ni uúntrin umirin asar, maánitsuk, ankán penker pujusarat tusar jú papí aarman umikiartinaiti.

TÁMA MENAÍNT

Aents niisha yajania akusha tuke jú papinkia amiktin aíniawai. Tura pénker ankan pujustin, kajernaitsuk, awatnaitsuk pujusartin aíniawai.

TÁMA AÍNTIUK

Aents tí iníátai, waitkíatia, tíí takákmaritiktai, aents surútai, aíniana aúka najashtin tama kákaram papi aárma awai. Tura aents niisha pénker puja anánkar, yajá nunkanam júkír surúkchatnuiti. Tura shuará muúke tsupikíar surukchatnuiti.

TÁMA EWEJ

Aents aínia au nánkamsar awattrashtiniaiti. Tura waitkíasar apújsashtiniaiti. Tura chíkích shuar tunamaru aínia ausha wishikrar, usúkiar, misú ukuinkíar natsánmai ekamsachminiaiti.

TÁMA UJÚK

Aents chíkích ainia au, waitmenmai amajainia wainkiurkia uunt ainia au wárik ujákartiniaitji. Kákaram chichamjai asutiawarat tusar, tura nuyá ayampruktin awai.

TÁMA TSÉNKENT

Kákaram chicha m juamunmaka, aents mash métek akiniawaru asamtai yaimkiartiniaiti. Aentsu awátin, waitmenmai amajainiakúinkia uúnt anaikíamu élinia aú, jú chichaman uminiachkui asútiamu aártiniaiti. Aents chíkích aentsun, kajéreak shainch íis ajakuinkia; wíjiainkia metékkchaitme takuish; aentstikia chíkích aentsjaish métek asar ayamrumaktiniaitji.

TÁMA YARÜSH

Mash aents amia aú, kákaram chicham .iwiartainiam, waúmak yaimiainiachkuinkia, aents kajérsuk, kakáram chichaman umikíariat tusar yainkiartiniaitji.

TÁMA USÚMTAI

Aents nánkamas weka wainkiursha, aántar achikíar sepunam enkeachminiaiti. Tura nánkamsar níí nunkénia, níí mátsatkamurinia yajá nunkanam júkishtiniaiti.

TÁMA NÁWE

Chíkích aents akuisha, kákaramchichamjainkia metékkrakainiaiwai. Tuma asamtai aents nankamsarkia sepunam enkeachminiaiti. Tura nankamsarkia ni matsatkamurinia, irutkamurinia enkémar yajá nunkanam júkichminiaiti.

TÁMA NÁWE CHIKÍCHIK

Aents chíkích aentsun antar kasámka wainkidchiat, waúrkir kasarrikayi tichatnuitji. Kasámka wainkia asarkia, aents uúnt anaikíamu ekétu ujaktiniaitji. Chíkích aents umitmakun, níí aentsri iniamrasha aminiaiti. Núna pénker nekamí tusar áya úntak unták iruntrar iwíaratin aíniawai. Tura nii shuari ii chichamejai chicharak ayamrakuinkia anturkatin aíniawai.

Ekuatura uuntri kákaram papí aárma iisar umikiartin aíniawai. Aents tunaku, nu papijiai sepunam urútma nantua pujustata, kuitniasha urútmana akikmaktinait tusar nu chicham pénker nekatín aín.iawai. Ekuatura uuntri kákaram papi aárma, aents umitsuk nankamas nukap tsawant .sepunam enkeachminiaiti, aentsank nánkamsar núkap kuit akikmakta tusarkia aents anankashtiniaiti.

TÁMA NÁWE JÍMIAR

Aents aántar, chíkích shuaran jeén nankamas waniachminiaiti. Tura aentsan ántar níí jeén enkéma níí imiatkinrin takaschatnuiti, tura entrar waintuar awatchatnuiti. Tura tsanumashtiniaiti. Aentsank wait chichamnasha etsérkenikia wekaishtinaiti. Nuna tura Ekuatura untri wainkiunka kákaram chichanijai jú aentsun asútiatnuiti.

TÁMA NÁWE MENAÍNT

Shuar nánkamas ni nunkenchu wekashtiniaiti. Tura aents tui pujustiniait nunasha ninki wakeruk jui pujustatjai titiniaiti.

Aents ni nunkenia jinki, yaja nunkanam pachitsuk weminiaiti. Tura nú aents, ni nunke waketkitiaj takunka, uyumatsuk waketkitnuiti.

TÁMA NÁWE AÍNTIUK

Aents ainia au nankamas chíkich aents kajerkamka, ni nunkenia jinki chikich nunkanam pachitsuk weminiaiti. Jú aentska yajá nunkanam pujústaj takunka ni wakeramu tsawantin, uwitin pujusminiaiti.

Aents niísha yajá nunkanam wétasa puja, turuskesh weá, itiurchat chi.cham jurúkchamniaiti. Chicham Naciones Unidas-num ejéramu aá asamtai.

TÁMANÁWE EWÉJ

Aents ni nunké akinia asa, tuke nú nunkanam achitkia atiniaiti. Tumaasamtai Ekuatura untri tuké yainma atiniaiti.

Aents ni nunke akinia, chikich nunkanam wetaj tau itiurchat amasachminiaiti, tumaitkuish chikich nunkanam pujustaj tusa wakera suritkiashtiniaiti.

TÁMA NÁWE UJÚK

Aeshman natsa, nua natsa ainia aú, pachitsuk ni aents wakeramurijai nuatnaik turuskesh, nuatak pujusminiaiti. Inkish tura tarimiat aents akusha, chikich aents ARÚTMAM- (Dios) enentaimtin akusha, yajania. nunka pachikia akusha, pachitsuk nuatak, nuatnaik ni shuarijiainajánairar pujusminiaiti. Tura aentsank ajapnaiyataj takusha pachitsuk ajapnayaimnia ainiawai.

Aeshman, nuajai mae wakerunai ajarar nuatnaikiarmin ainiawai. Nua, aeshman imian nuátak, nuatnaik pujuschamnia enentaimkiunka turachminiaiti, áyatkish tsanink pujúsminiaiti.

Aents nuatnaik nuwen, uchirin takakuka, irutkamunam, matsatkamunam paan ajarar pujusartiniaiti, tuma asamtain Ekuatura untrinkia chicham yajauch akuish pachitsuk ayamrutináwai.

TÁMA NÁWE TSÉNKENT

Aents ni jeen sumáku asa, ni nérentin atiniaiti. Jeán, aján takakuinkia niniuk atiniaiti, tumaitkush matsatkamunmash, initkamunmash chikich aentsjai irunar takákmasaruitkuinkia niniu ainiawai.

Aentsu jeéncha, twra ajarincha, warín áchat mash niniu asarmatai, aántrar núnka atánkir aents jurúkchatnuiti tama aárma áwai.

TÁMA NÁWE YARUSH

Aents pachitsuk ni wakeramun, ánkan enentaimin aátiniati, tura niísha ARÚTMARIN enentaimtin árhliniaiti. Tura pachitsuk ni ARÚTMARIN, ni enentai yapajia, ankan pénker pachitsuk pujusmin ainiawai. Nuna turuiniakuinkia úmas turúskesh paánt ajásar warinkish ARÚTMAN wararsamnia ainiawai.

TÁMA NÁWE USÚMTAI

Aents ni enentaimmian, ishamsuk chikich aetns ainia aúnn ujaktin ainiawai. Tura aentsank chikich aents ainia au, metekrakka enentaimin ainiatsui, tumaitiak itiurchat aents chichaku asarmatai, itiurchat amasashtiniaiti. Chicham pénker nekar tuinkish etsérkamu atiniaiti ishamsuk.

TÁMA NÁWE JÍMIAR

Aents maánitsuk pénker pujuinia shiir awajsar yainkiar iruntrar nuamtak pénker pujustiniaiti.

Turasha aents irunar nuámtak tsanink pujustajtsa nakitia, antrar utsukchatnuiti.

TÁMA NÁWE JÍMIAR CHIKÍCHIK

Mash aents Ekuatura untri chichame etserkui, umirkatnuitji. Ekuatura untri, aents anaik takákma tusa apújsamujai pénker iruntrar takakmastiniaitji.

Aents Ekuaturnum pachitkia asa tuinkish pachiniaik takakmastiniaiti.

Aents ni aentsrijai, anaik ekentsamu, Ekuatura untri arantuktiniaiti. li aentsri anaikiar ekentsami tusarkia, papinium ajaptainiam anaikiar, ekentsamu atiniaiti.

TÁMA NÁWEJÍMIAR JÍMIAR

Aents mash ankán uyúatsuk pénker enentaimsar pujusarat tusar, Ekuatura untri ii aentsri yaintiniaíti. Chikich nunkanmaya uunt anaikiamu akusha, Ekuatura uuntri pachitsuk yainkiartin ainiawai.

TÁMA NÁWE JÍMIAR MENAÍNT

Aents ni takátan wakérak emkéma takakmasminiaiti. Chíkich aents takákmana aentsank niisha métek íisma atiniaiti. Uchi takákma puja ajápamu akuish tuke ayámrukma atiniaiti.

Aents nuwa, tura aishman akusha chikich aentSjai métek íisma atiniaiti. Aents nakitrar muijkiamu achatnuiti.

Aents ni aijjai métek takákma puja, kuit métek 'akikma atiniaiti. Waras kuitiah achik ni nuwen, ni aishrin, ni uchirin pushi sumarak, apatkun sumarat ayurat tusar. Ni aentsrijai pénker irunar, wárás wariniaksha sumak yuawarat tusar. Nuna Ekuatura uuntri ayamruktiniaiti.

Ni matsatkamurin, ni irutkamurin aents iruntrar, ni nunkén tesawar achikman ayamrumakar pénker pujúsarat tusar, chicham jurúkma áwai.

TÁMA NÁWE JÍMIAR AÍNTIUK

Aentsun tuke takákmas ayamratin tama áwai. Tura tsawant ankan akuish tuke ayamratin ainiawai. Ni wakéramun takákmasar, ayamratin ainiawai, tura ankántan jusar tuinkish wear ayamratin ainiawai.

TÁMA NÁWE JÍMIAR EWÉJ

Aents tsukamtsuk, entsatairincha tuke taku, ni jeé pujutairi ankan pénker pujusartiniaiti. Sunkúrmaku akusha tsuamatainiam weár tsuakan sumakar tsuamartin ainiawai. Yurumtainash tuke takáku aártiniaiti. Aentsan aents takatnum ajápamu akuish Ekuatura untrinkia tuke ayamruktin atiniaiti. Aents tunamar jaákuish, sunkúrmak pujakuish, wajema pujakuish, untach ajas pujakuish, tura warinkish ni pujamurin eménkaktataish túke ayamrumakma atiniaiti.

Nuwa ajamtin, tura uchi kuir ainiana ausha, pénker yainma atiniaiti. Uchi takusar ajapamu akuish, Ekuatura untrin ayámrukma atiniaiti tama aárma áwai.

TÁMA NÁWE JÍMIAR UJÚK

Uchi kuér ainia aú tuke unuimiatainiam unuimartin ainiawai. Uchi unuimartinkia kuitchaiti, Ekuatur yaimiu asamtai. Uchikia mash tuke unuimartin ainiawai, Ekuatura untri útsua asamtai. Aentsan natsasha nuú nankámas unuimarmín ainiawai. Ninki kakáram ajarar unuimiarartin ainiawai.

Aents unuimian emtikia, nuú arán nankámaki unuimiaki weán yayáwai. Tura jú aentska tumaki weak warinkish nekaki, pénker chikich aentsjaish irunar amikrnanaiki wetin ainiawai.

Apawach, nukuach ainia aúka, ni uchirin níf wakeramu unuimiarat tusar utsuktin ainiawai.

TÁMA NÁWE JÍMIAR TSÉNKENT

Aents ni puJustinrin, ni nekatairin, iis pénker pujustaj tau tuinkish pachinaik irunar pénker pujusmij taun útsukma atiniaiti. Tura aents mash iruntrar emkatin enentai achikiar, ará arant unuimiarar, emkatin enentai achikiar pujustin ainiawai.

Aents imiatkinia najánan, chikich aents níí najána aitkiash jukichminiaiti, nuna Ekuatura uuntri tuke ayamrukma atiniaiti.

TÁMA NÁWE JÍMIAR YARUSH

Kákaram papi jui aarmaka, mash ju nunkanam pujati tuke umiktiniaitji. Wari Ekuaturnum tura yajánunkanam aents tuákar jú papin pénker aárraru asamtai.

TÁMA NÁWE JÍMIAR USÚMTAI

Aents mash iruntrar ankan pénker enentaimsarpujusarmi tusar, uunt anairamu matskamuham pujuinia yainma atiniaiti.

Aents ainia au ankan pénker pujusarmi tusar wakeriniaka, chikich aents ainia aujai kajernaitsuk, manitsuk pujusartin ainiawai. Tuma asamtai mash iruntrar métek pujuiniak, Ekuatura uuntri kákaram papi arman umikiartin ainiawai.

Aents mash ankán pénker pujúsarmij tusar wakeruiniaka, ju kákaram papi arma tuke umikiartin ainiawai.

TÁMA MENAINTIU NÁWE

Ju kákaram papi arman nekáwaru asar aents túke umikiartin ainiawai. Aents junanekawar, ankán pénker pujusarat tusar, uunt chikichkimsar surimkiartiniaiti. Tura chikich aents ainiana ausha nunaká surimkiachartin ainiawai. Jú kakaram chicham apipium aarman mash aentstikia umikiartin ají.